



UMP jalin kerjasama dengan 4 IPT Turki

Universiti Malaysia Pahang (UMP) menandatangani Memorandum Persefahaman (MoU) dengan empat Institusi Pengajian Tinggi (IPT) dari Turki melibatkan Suleyman Sah University, Sakarya University, Karabuk University dan Sercuk University bagi menjalinkan kerjasama dalam program pengajian akademik dan penyelidikan di UMP.

Majlis menyaksikan acara menandatangani MoU disempurnakan Naib Canselor UMP, Profesor Dato' Dr. Daing Nasir Ibrahim dan Timbalan Naib Canselor (Akademik & Antarabangsa), Profesor Dato' Ir. Dr. Badhrulhisham Abdul Aziz.

Manakala mewakili IPT Turki ialah Rektor Suleyman Sah University, Profesor Dr. Huseyin Ekiz, Rektor Sakarya University, Profesor Dr. Muzaffer Elmas, Rektor Karabuk University, Profesor Dr. Burhanettin Inem dan Rektor Sercuk University, Profesor Dr. Hakki Gokbel. Hadir menyaksikan majlis bersejarah ini Ahli Lembaga Eksekutif Pengajian Tinggi Turki, Profesor Dr. Durmus Gunay.

Menurut Dato' Dr. Daing Nasir, kerjasama ini bermula hasil daripada termeterainya kerjasama antara UMP dengan pihak Malaysian Turkish Dialogue Society (MTDS) dalam meneroka peluang kerjasama dengan rakan daripada Institusi Pengajian Tinggi di Turki dua bulan lalu.

Dato' Dr. Daing percaya hubungan yang terjalin ini akan mengukuhkan ikatan di antara Malaysia dan kerajaan Turki. Malah, sektor pengajian tinggi melibatkan kedua-dua negara ini mempunyai potensi yang sangat luas untuk diterokai.

"Kerjasama ini melibatkan pembangunan penyelidikan, kerjasama akademik, pengajian pascasiswazah, program jangka pendek akademik untuk prasiswazah dan program dwijjazah," katanya semasa berucap di Hotel The Royale Bintang Kuala Lumpur pada 14 Mei 2013 yang lalu.

Katanya, UMP memberikan sepenuh penumpuan terhadap pelaksanaan Pelan Strategik UMP 2011-2015 yang mana salah satu bidang keberhasilannya adalah penjenamaan untuk penjajaran strategik bagi memastikan pendekatan terbaik bagi mewujudkan satu jenama global untuk merealisasikan hasrat UMP menjadi sebuah universiti teknologi bertaraf dunia.

Tambah Dato' Dr. Daing, dua bidang keberhasilan utama universiti (UKRA) ini membabitkan penambahbaikan dalam kualiti akademik dan penjenamaan untuk penjajaran strategik bagi memaknakan hubungan kerjasama strategik ini.

Beliau berharap dengan adanya hubungan kerjasama ini juga akan memanfaatkan program pertukaran pelajar

dan staf UMP, latihan industri, pemindahan kredit, sabatikal dan penasihat akademik sepanjang tempoh lima tahun ini.

Malahan, beliau juga mengalu-alukan staf dan pelajar dari Suleyman Sah University, Sakarya University, Karabuk University dan Sercuk University ini untuk terlibat sama dalam memanfaatkan hubungan antarabangsa ini.

Bagi Profesor Dr. Durmus pula, pihaknya percaya kedua-dua pihak akan dapat lebih banyak faedah menerusi jalinan kerjasama ini terutamanya dalam bidang kejuruteraan dan teknologi.

Majlis turut dihadiri Pengarah Pejabat Antarabangsa, Profesor Madya Dr. Ainol Haryati Ibrahim dan Dekan Fakulti Sistem Komputer & Kejuruteraan Perisian (FSKPP), Profesor Dr. Jasni Mohamed.

